

**Najib Janji Jadi Perdana Menteri Bagi Seluruh Rakyat Malaysia
Bernama
10 Mei, 2013**

KUALA LUMPUR, 10 Mei (Bernama) -- Datuk Seri Najib Tun Razak hari ini berjanji akan menjadi Perdana Menteri bagi seluruh rakyat Malaysia tanpa mengira agama, bangsa mahupun ideologi politik.

"Cinta saya terhadap negara kita tidak mampu saya jelaskan dengan kata-kata, dan saya amat bangga serta bersyukur dengan pencapaian Malaysia sehingga ini.

"Saya percaya, jika kita bekerjasama sebagai satu bangsa negara, Insya-Allah kejayaan yang lebih besar lagi akan berada di dalam genggaman kita," kata Najib dalam entri terbaharu beliau di Blog 1Malaysia.

Dalam entri bertajuk 'Terima Kasih Malaysia' itu, Perdana Menteri juga berjanji kerajaan Barisan Nasional (BN) akan berusaha bersungguh-sungguh untuk menolak fahaman ekstrem dan perkauman yang tidak memanfaatkan negara.

"Selain itu, kami juga akan meneruskan usaha untuk meningkatkan amalan konsep kesederhanaan atau wasatiyyah di kalangan rakyat berbilang kaum di Malaysia," katanya.

Najib yang juga Pengerusi BN turut merakamkan penghargaan terima kasih kepada para pengundi serta semua pihak kerana memberi kepercayaan kepada kepimpinan BN untuk terus mentadbir negara.

Pada Pilihan Raya Umum ke-13 (PRU13) Ahad lepas, BN berjaya mengekalkan mandat untuk memerintah kerajaan pusat dengan majoriti mudah apabila memperoleh 133 kerusi Parlimen.

Najib juga berkata beliau telah berkhidmat sebagai penjawat awam hampir sepanjang pengalaman kerjayanya selama ini.

"Saya masih ingat lagi kali pertama saya dipilih menjadi Ahli Parlimen, kali pertama saya berucap di Parlimen dan kali pertama saya menjalankan tanggungjawab sebagai ketua jabatan kerajaan.

"Sepanjang empat tahun yang lalu, saya telah diberi peluang pula untuk berkhidmat untuk negara ini di peringkat tertinggi sebagai Perdana Menteri.

"Namun pencapaian paling bererti tercatat pada awal pagi Isnin lalu adalah apabila saya diberi mandat oleh rakyat untuk menyempurnakan segala perancangan dan pelaksanaan yang telah saya mulakan sejak empat tahun yang lalu," katanya.

Najib turut mengakui bahawa PRU13 merupakan pilihan raya yang paling sengit dalam sejarah negara.

Sepanjang beberapa minggu kebelakangan ini, katanya, banyak pandangan dan hujah-hujah yang berbeza ditawarkan kepada rakyat, malah ada yang menyemarakkan semangat, namun tidak kurang juga yang menimbulkan kemarahan dan prasangka.

"Kita baru sahaja menempuh satu proses demokrasi yang terbesar dan paling mencabar di

negara kita.

"Di setiap kampung, pekan dan bandar, setiap rakyat telah berdebat, berkempen dan mengundi untuk masa hadapan negara," katanya.

Setelah tamatnya tempoh pilihan raya, Najib meminta semua pihak kembali ke arah kedamaian dan keharmonian demi Malaysia yang dicintai.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=948883>